

PRINCIPI POLITIČKOG DJELOVANJA NA SUZBIJANJU NASILJA NAD ŽENAMA

Cijeneci ravnopravnost između žena i muškaraca kao temelj demokratije, vrednujući potrebu za ravnopравnom zastupljenošću muškaraca i žena u političkom životu te uvjereni da postoji potreba za ulaganjem maksimalnog truda za sprečavanje i rješavanje problema nasilja nad ženama u svim njegovim oblicima, obavezujemo se da ćemo poštovati sljedeće principe:

PRINCIP NULTE TOLERANCIJE nasilja nad ženama

Političke stranke, kao primarni nosioci političkih procesa, imaju obavezu da pokažu nultu stopu tolerancije prema nasilju nad ženama u privatnom, javnom i političkom životu. One značajno utiču na javni diskurs i procese donošenja politika rada. Kao takvima, dužnost im je da svojim primjerom promoviraju vrijednosti ravnopravnosti, poštovanja i nenasilja. Kada političke stranke pokažu nultu stopu tolerancije prema nasilju nad ženama, time šalju snažnu poruku svojim članicama i članovima, pristalicama i društvu u cijelosti da je takvo ponašanje neprihvatljivo i da se neće tolerirati.

PRINCIP RAVNOPRAVNOSTI unutar stranke

Političke stranke bi trebale poštivati princip ravnopravnosti kao jedan od svojih osnovnih postulata kako bi osigurale ženama i muškarcima, u svoj njihovoj raznolikosti, jednak tretman i jednake prilike za učešće, zastupanje i vodstvo unutar stranke. Ova obaveza ne smije ostati deklarativna i svoditi se na zagovaranje te mora odražavati konkretne mjere uvedene kao odgovor na postojeću neravnopravnost i pružanje podrške ženama unutar stranačke strukture.

PRINCIP DJELOTVORNOG POLITIČKOG ANGAŽMANA U STRUKTURAMA IZVRŠNE VLASTI radi suzbijanja nasilja nad ženama

Stranke trebaju promovirati rad na suzbijanju nasilja nad ženama kao jedan od centralnih principa svog političkog programa. Kroz svoje izabrane članice i članove kao predstavnice i predstavnike vlasti, stranke mogu pružiti podršku provedbi sveobuhvatnih politika rada i inicijativa na suzbijanju nasilja, zaštiti i pružanju pomoći žrtvama/preživjelima nasilja. Stranke prepoznaju činjenicu da društvo oslobođeno nasilja nad ženama predstavlja ključ uspješnog ostvarenja istinske ravnopravnosti i pravde za sve.

PRINCIP DJELOTVORNOG POLITIČKOG ANGAŽMANA U STRUKTURAMA ZAKONODAVNE VLASTI radi suzbijanja nasilja nad ženama

Predstavnice i predstavnici stranke imaju priliku da kroz politički angažman u strukturama zakonodavne vlasti iniciraju usvajanje političkih rješenja kojima se kažnjava diskriminatorno i nasilno ponašanje prema ženama. Članice i članovi parlamenta treba da reagiraju na slučajeve nasilja nad ženama i time pošalju jasnu poruku da se nasilje neće tolerirati. Stranke prepoznaju da je redovan institucijski i parlamentarni nadzor ključan za osiguranje kvalitetnih zakonodavnih rješenja i usaglašenih praksi u odgovoru na nasilje nad ženama.

Kraj